


CON E BARIO DI "BOTON" NA SANTA CRUZ A HAYA SU NOMBER



Un coleccion di e botonnan cu un buraco

Kisas poco hende na Aruba sa e berdadero historia tras di e nomber di e luga aki na Santa Cruz, pabou di Jamanota, cual ta ser yama "Boton". Pero e residentenan di e bario si sa di unda e nomber a bin. Sinembargo, nan no por bisa ki tempo e nomber a ser usa pa prome biaha. Pero esnan cu a bin despues ta bisa cu e nomber muy probabel ta bay bek te na nan antecendentenan.



Foyan Maduro y su suegro Francisco Curiel

E bario "Boton" ta ser yama asina pasobra botonnan a ser traha y haya na e sitio ey den tempo bieu y un tempo ainda por a haya algun eybanda. E botonnan aki tambe tin algo peculiar cu nan. Nan tin solamente un buraco den centro y nan a ser traha pa e Indjannan den tempo antaño, for di pidanan di cocolishi of casca di calco. Nan tin forma rondo mescos cu botonnan normal y nan a ser traha den varios tamaño.

Ki obheto Indjannan a usa pa traha e buraco den e centro ta solamente por ser adivina. Como cu e casca di calco ta basta duro, nan mester tabatin algun obheto skerpi den nan dianan pa por a bora un buraco di 1/16 of 1/8 di un duim.



Tampoco no ta conoci por cierto cu nan a ser usa berdaderamente como boton of podise pa traha coyar of armband.

Na aña 1975, un amigo y colega di trabou di mi, Sr. Laureano (Foyan) Maduro, un Assistant Operator na Acid Plant na Lago, e tempo ey tabata biba cerca di e tereno di su suegro, Sr. Francisco Curiel, a conta cu ainda e botonnan aki tabata ser haya. Sr. Curiel tabata biba na Boton 9. Su yiu muhe, Jacinta Maduro-Curiel, casa di

Martina Maduro ta muestra un coyar

Foyan y nan yiu Martina tabatin un coleccion chikito di obranan di man di e Indjannan di antes. Nan yiu, Tommy, e tempo ey ainda tabata sa unda pa haya e botonnan ey.

Sr. Curiel kenda a traha den construccion di e prome tankinan di Lago na aña 1926, ganando Fls.2.50 pa dia ta conta algo tocante e botonnan: "Hopi di e botonnan aki di un buraco a ser haya den pasado na Sero di Boton situa den mi tereno. Mi a bin biba aki banda desde 1908, pero e nomber ya tabata existi hopi tempo prome cu esey. Mi ta kere cu esaki ta e unico luga na Aruba unda Indjannan a traha e tipo di obra di man aki. E botonnan aki na Boton tabata y ainda ta un proyecto interesante di investigacion pa arkeologonan cu ta specialisa den cultura Indjan. Pero nan a bira hopi scars, como cu centenaries di nan a ser piki pa esnan curioso pa inclui den nan coleccion."

Dufi Kock
Escritor y Historiado